



АРХАНГАЙ АЙМАГ ДАХЬ ТӨРИЙН АУДИТЫН ГАЗАР

Аудитын сэдэв:

ЭРҮҮЛ МЭНДИЙН ДААТГАЛ, ҮР ДҮНД СУУРИЛСАН САНХҮҮЖИЛТИЙН
ТОГТОЛЦОО, ҮР НӨЛӨӨ СЭДЭВТ ГҮЙЦЭТГЭЛИЙН АУДИТЫН ХУРААНГУЙ ТАЙЛАН

Аудит хийсэн үндэслэл, бүрэн эрх:

Аудитыг “Төрийн аудитын тухай хуулиар тодорхойлсон бүрэн эрхийн хүрээнд Монгол Улсын Ерөнхий аудиторов 2023 оны А/04 дугаар тушаалаар баталсан “Төрийн аудитын байгууллагын 2023 оны аудитын жилийн төлөвлөгөө”-ний дагуу гүйцэтгэв.

Аудитын гол дүгнэлт:

ЭРҮҮЛ МЭНДИЙН ДААТГАЛЫН ҮР ДҮНД СУУРИЛСАН САНХҮҮЖИЛТИЙН
ТОГТОЛЦООНД ШИЛЖСЭНЭЭР ЭРҮҮЛ МЭНДИЙН БАЙГУУЛЛАГЫН ГҮЙЦЭТГЭЛ
САЙЖИРЧ БАЙГАА ХЭДИЙ Ч ТУСЛАМЖ ҮЙЛЧИЛГЭЭНИЙ ЧАНАР ОРХИГДОЖ
БОЛЗОШГҮЙ БАЙНА

Тайланг хүргүүлсэн этгээд:

Үндэсний аудитын газар, аймгийн ИТХ, аймгийн Эрүүл мэндийн даатгалын хэлтэс

Аудитын харилцан хамаарал:

Аудитын төлөвлөлтийн явцад судалсан баримт материал, хийсэн урьдчилсан дүн шинжилгээ, харилцан ярилцлагад үндэслэн “Эрүүл мэндийн даатгал, үр дүнд суурилсан санхүүжилтийн тогтолцоо, үр нөлөө”-нд хийх аудитын ерөнхий эрсдэлийг “Дунд” гэж үнэлсэн.

Аудитын зорилго, зорилтууд, хамарсан хүрээ:

Эрүүл мэндийн даатгал, үр дүнд суурилсан санхүүжилтийн тогтолцоо, үр нөлөөнд гүйцэтгэлийн аудит хийж, дүгнэлтгарган, зөвлөмж боловсруулан дүнг холбогдох байгууллага, албан тушаалтанд танилцуулахад аудитын зорилт чиглэгдлээ.

Уг зорилтыг хангахын тулд дараах дэд зорилтын дагуу аудитыг хийж гүйцэтгэлээ.

- ✓ Эрүүл мэндийн даатгалын тогтолцоо, үйл ажиллагааны үр дүн, төрөөс баримтлах бодлогын баримт бичгийн хэрэгжилт хангагдсан эсэх
- ✓ Эрүүл мэндийн байгууллагаас даатгуулагчийн эрэлт хэрэгцээ, шаардлагад нийцсэн эрүүл мэндийн чанартай тусламж, үйлчилгээ үзүүлж байгаа эсэх

Аудитад аймгийн Эрүүл мэнд даатгалын хэлтэс, Нийгмийн даатгалын хэлтэс, Эрүүл мэндийн тусламж, үйлчилгээ үзүүлэгч төрийн болон хувийн хэвшлийн байгууллагууд, өрх, сумын эрүүл мэндийн төвүүд, хөнгөлөлттэй үнээр үйлчилдэг эмийн сангуудын 2021-2022 онд эрүүл мэндийн даатгалын сангаас авсан санхүүжилтийн гүйцэтгэлийг хамрууллаа.

Аудитын гол дүн:

“Эрүүл мэндийн даатгал, үр дүнд суурилсан санхүүжилтийн тогтолцоо, үр нөлөө”-нд хийсэн аудитаар нийт 22.1 сая төгрөгийн зөрчил илэрсэнд төсөвт буцаан төлүүлэх төлбөрийн акт 8, зөрчил арилгуулах албан шаардлага 1, зөвлөмж 3-ыг тус тус шалгадагч байгууллагуудад хүргүүлсэн. Мөн аудитын тайлангаар Үндэсний аудитын газарт 2 заалт бүхий уламжлах саналыг хүргүүлэв.

А. ТӨРӨӨС БАРИМТЛАХ БОДЛОГЫН БАРИМТ БИЧГҮҮДЭД ЭРҮҮЛ МЭНДИЙН ЧИГЛЭЛЭЭР ТУСГАСАН ЗОРИЛТ, АРГА ХЭМЖЭЭНИЙ УЯЛДАА ХОЛБОО, ХЭРЭГЖИЛТИЙГ ОРОН НУТГИЙН ТҮВШИНД ХАНГАН АЖИЛЛАЖ БАЙНА

Аймгийн Засаг даргын 2020-2024 оны үйл ажиллагааны хөтөлбөр, аймгийн хөгжлийн 2021, 2022 оны төлөвлөгөөнд эрүүл мэндийн чиглэлээр цахим монгол арга хэмжээний хүрээнд:

- ✓ Эрүүл мэндийн мэдээллийн нэгдсэн сан бүрдүүлэх
- ✓ Орон нутагт хийгдэх оношилгоо эмчилгээнд алсын зайн технологи ашиглах
- ✓ Цахим эрт илрүүлэг, гүйцэтгэлд суурилсан санхүүжилтийн оновчтой арга хэлбэрийг нэвтрүүлэх үйл ажиллагааг дэмжих, эрүүл мэндийн даатгалын тусламж үйлчилгээний нэр төрлийг нэмэгдүүлэх
- ✓ Эм эмнэлгийн хэрэгслийн чанар аюулгүй байдлыг хангах
- ✓ Хяналтын цахим тогтолцоонд шилжихтэй холбоотой зорилт арга хэмжээг тусган ажилласан байна.

Бодлогын хүрээнд аймгийн Засаг даргын 2020-2024 оны үйл ажиллагааны хөтөлбөр, аймгийн хөгжлийн 2021, 2022 оны төлөвлөгөөнд эрүүл мэндийн

чиглэлээр тусгасан арга хэмжээний хэрэгжилтийг аймгийн Хяналт шинжилгээ үнэлгээний хэлтсээс хэрэгжилтийг 75.5 хувьтай үнэлсэн байна.

Орон нутгийн түвшинд төрөөс баримтлах бодлогын баримт бичгүүдэд эрүүл мэндийн чиглэлээр тусгагдсан зорилт, арга хэмжээний уялдаа холбоо, хэрэгжилтийг ханган ажилласан байна.

Б. ИРГЭДЭД ҮЗҮҮЛЭХ ЗАРИМ ТУСЛАМЖ ҮЙЛЧИЛГЭЭНИЙ САНХҮҮЖИЛТ ЭРҮҮЛ МЭНДИЙН ДААТГАЛЫН ГЭРЭЭГЭЭР ХЯЗГААРЛАГДАЖ БАЙНА

2021 онд эрүүл мэндийн даатгалын шимтгэлийн орлого **3,837.5** сая төгрөг төвлөрүүлэхээс гүйцэтгэлээр **3,789.8** сая төгрөгийн орлого төвлөрүүлж төлөвлөгөө 98.7 хувийн хэрэгжилттэй, 2022 онд **9,401.4** сая төгрөгийн орлого төвлөрүүлэхээс гүйцэтгэлээр **4,529.9** сая төгрөгийн орлого төвлөрч төлөвлөгөө 48.2 хувийн хэрэгжилттэй байна.

Хүснэгт 1. Аймгийн Эрүүл мэндийн даатгалын сангийн орлогын төлөвлөгөө, гүйцэтгэл, даатгалд хамрагдалтын судалгаа /сая.төгрөг/

Үзүүлэлт	2021 оны хамрагдалт, шимтгэлийн орлого					2022 оны хамрагдалт, шимтгэлийн орлого				
	Төлөвлөгөө		Гүйцэтгэл			Төлөвлөгөө		Гүйцэтгэл		
	тоо	дүн	тоо	дүн	Хувь	тоо	дүн	тоо	дүн	Хувь
Ажил олгогч, даатгуулагчийн төлөх шимтгэл	-	3,228.5	14757	3,241.1	100.0	-	8,460.1	15537	3,703.0	100.0
Дүн	-	3,228.5	14757	3,241.1	100.0	-	8,460.1	15537	3,703.0	100.0
Хувиараа хөдөлмөр эрхлэгч	3750	182.7	3208	164.6	85.5	3375	282.4	3515	248.0	104.1
Малчин	15800	365.4	4798	329.1	30.4	12400	564.8	5650	496.0	45.6
Оюутан, суралцагч	2500	60.9	565	54.9	22.6	2000	94.1	479	82.7	23.9
Дүн	22050	609.0	8571	548.6		17775	941.3	9644	826.7	
ЭМД-ын шимтгэл төлөх хугацааг хэтрүүлсэнд ногдуулсан алданги				0.2					0.2	
НИЙТ ДҮН	22050	3,837.5	23328	3,789.9		17775	9,401.4	25181	4,529.9	

2021 онд аймгийн Эрүүл мэндийн даатгалын хэлтэс нь эрүүл мэндийн байгууллагуудаас ирүүлсэн 367,653 хүний 24,592.1 сая төгрөгийн нэхэмжлэлд эмч байцаагчийн хяналтыг хийж 4851 хүний 2,916.9 сая төгрөгийн нэхэмжлэлд хасалт хийсэн бөгөөд ковид-19 цар тахалтай холбоотой нөхцөл байдлын улмаас Эрүүл мэндийн даатгалын сангаас 4,146.5 сая төгрөгийн дутуу буюу 17,528.7 сая төгрөгийн санхүүжилт олгожээ.

2022 онд 431,109 хүний 30,588.1 сая төгрөгийн нэхэмжлэлийг хянаж 6055 хүний 1,925.9 сая төгрөгийн нэхэмжлэлд хасалт хийж гүйцэтгэлээр 28,662.2 сая төгрөгийг олгохоор тооцсон боловч урьд оны өрийг бүрэн барагдуулж, 39.7 сая төгрөгийн авлага үүсгэж 32,848.4 сая төгрөгийн санхүүжилтийг тус тус олгосон байна.

Архангай аймаг дахь Эрүүл мэндийн даатгалын хэлтэс нь дарга-1, чанарын төлбөрийн хяналтын мэргэжилтэн-2 гэсэн бүтэцтэй ажиллаж байна. Аймгийн Эрүүл мэндийн даатгалын хэлтэст жилд дунджаар 399,381 хүний нэхэмжлэл ирдэг бөгөөд нэг байцаагч жилд дунджаар 133,127 хүний, сард 11,093 хүний нэхэмжлэлд цахим болон эмч байцаагчийн хяналтыг хэрэгжүүлдэг байна.

Харин газар дээрх хяналтыг 2022 онд аймгийн төвийн 19-н эрүүл мэндийн байгууллага, 2 сумын 6-н эрүүл мэндийн байгууллага нийт 25-н эрүүл мэндийн байгууллагад хийжээ.

Эрүүл мэндийн даатгалын хэлтэс нь 2021-2022 онд эрүүл мэндийн байгууллагуудад хяналт, шалгалт, чанарын үнэлгээ хийх чиг үүргийг аймгийн эрүүл мэндийн тусламж үйлчилгээ үзүүлж байгаа 75 байгууллагын 9.3-33.3 хувийг хамарсан боловч чанар, төлбөрийн хяналтад дүн шинжилгээ хийж тайлагнах чиг үүргийг хэрэгжүүлээгүй байна.


Хяналт, шалгалт, чанарын үнэлгээнд хамрагдах эрүүл мэндийн байгууллагын тоог нэмэгдүүлэх, чанар, төлбөрийн хяналтад дүн шинжилгээ хийж тайлагнах чиг үүргийн хэрэгжилтийг бүрэн ханган ажиллах зөвлөмжийг Эрүүл мэндийн даатгалын хэлтэст хүргүүллээ.

Аймгийн Эрүүл мэндийн даатгалын хэлтсийн 2021, 2022 оны жилийн эцсийн нэгтгэсэн тайлан мэдээ алдаатай, зарим тоон мэдээллийг орхигдуулан, зөрүүтэй тайлагнасан байна.

"Бүртгэл тайлангийн маягыг шинэчлэн батлах тухай" Эрүүл мэндийн сайдын 2022 оны А/355 дугаар тушаалын хавсралт маягтаар гаргаж байгаа бүртгэл, тайлан мэдээг алдаагүй үнэн зөв тайлагнаж ажиллах зөвлөмжийг хүргүүллээ.

Эрүүл мэндийн даатгалын ерөнхий газрын сонгон шалгаруулалт гэрээлэлтийн асуудал хариуцсан нэгж нь Эрүүл мэндийн даатгалын үндэсний зөвлөлийн 2022 оны 02 дугаар тогтоолоор баталсан “Эрүүл мэндийн тусламж, үйлчилгээ үзүүлэх байгууллагыг сонгон шалгаруулах журам”-ын 3.1-т заасны дагуу зохион байгуулсан байна.

Аймгийн хэмжээнд 2021 онд 48 эмийн сан, 29 эрүүл мэндийн байгууллага давхардсан тоогоор 21 тусламж үйлчилгээг худалдан авахаар, 2022 онд 41 эмийн сан, 30 эрүүл мэндийн байгууллага давхардсан тоогоор 24 тусламж үйлчилгээг худалдан авахаар сонгон шалгаруулалтад оролцож, гэрээг байгуулсан байна. *График 1.*



“Эрүүл мэндийн тусламж, үйлчилгээ үзүүлэх байгууллагыг сонгон шалгаруулах журам”-д “Сонгон шалгаруулалтыг гурван жилд нэг удаа нэгдсэн журмаар зохион байгуулна” гэснийг өөрчлөх, шаардлага хангасан тохиолдолд жил бүр эрүүл мэндийн байгууллагууд оролцох боломжийг бий болгох нөхцөлөөр хангах, нэмэлт шалгаруулалтад хязгаарлалт тогтоохгүй байх саналыг Эрүүл мэндийн даатгалын үндэсний зөвлөлд уламжиллаа.

Эрүүл мэндийн даатгалын хэлтэс нь 2021-2022 онд 21 өрх, сумын эрүүл мэндийн төв, 89 эмийн сантай гэрээ байгуулж гэрээний хэрэгжилтийг 85-95 оноогоор үнэлсэн байлаа.

Эрүүл мэндийн байгууллагууд нэг худалдан авагчийн тогтолцоонд шилжиж, лавлагаа шатлалын тусламж, үйлчилгээг зөвхөн гүйцэтгэлд суурилсан, анхан шатны тусламж үйлчилгээ үзүүлэгч сум, өрхийн эрүүл мэндийн төвүүдийг нэг иргэнээр тооцсон болон гүйцэтгэлд суурилсан төлбөрийн аргаар Эрүүл мэндийн

даатгалын сангаас санхүүжүүлэх болсноор тусламж үйлчилгээнд дараах өөрчлөлт, үр нөлөө бий болж эхэлж байна.


Тухайлбал:

- ✓ Нэгдсэн эмнэлэг нь 2021 онд 10 тусламж үйлчилгээний хүрээнд 11,289.2 сая төгрөгийн гүйцэтгэлтэй байсан бол 2022 онд 4 тусламж үйлчилгээ нэмэгдэж нийт 14 тусламж үйлчилгээний хүрээнд 11,107.9 сая төгрөгийн гүйцэтгэлтэй ажилласан.
- ✓ Сум, өрхийн эрүүл мэндийн төвүүд нь 2021 онд өдрийн эмчилгээ, сэргээн засах, гэрийн сувилахуй, оношилгоо шинжилгээ гэсэн 4 тусламж үйлчилгээний хүрээнд 6,154.8 сая төгрөгийн гүйцэтгэлтэй байсан бол 2022 онд тусламж үйлчилгээний тоо **4-р нэмэгдэж** нийт 8 тусламж үйлчилгээний хүрээнд 13,953.5 сая төгрөгийн гүйцэтгэлтэй байна.
- ✓ Эмийн сангуудад 2021 онд 1,489.7 сая төгрөгийн, 2022 онд 1,694.4 сая төгрөгийн санхүүжилт авч өмнөх оноос 204.7 сая төгрөгөөр өссөн нь хөнгөлөлттэй эмийн нэр төрөл нэмэгдсэн, Новартис эмийн хүртээмжийг сайжруулах хөтөлбөрийн хүрээнд 15 ерөнхий нэршлийн 24 тун хэмжээ бүхий эмийг Эрүүл мэндийн даатгалын сангийн 100 хувийн хөнгөлөлттэй үнээр олгох болсонтой холбоотой байна.
- ✓ Хувийн 6 эмнэлэгт 2021 онд 2,092.4 сая төгрөгийн гүйцэтгэлтэй ажилласан бол 2022 онд санхүүжилтийн гүйцэтгэл 661.6 сая төгрөгөөр буурсан нь тогтолцооны хүрээнд хийгдсэн сонгон шалгаруулалтаар зарим тусламж үйлчилгээг Эрүүл мэндийн даатгалын сангаас санхүүжүүлэхгүй болсонтой холбоотой байна.

Эндээс үзэхэд шинэ тогтолцоонд шилжсэнээр эрүүл мэндийн байгууллагуудын үзүүлэх тусламж үйлчилгээний тоо, хүртээмж нэмэгдэх, тусламж үйлчилгээний төвлөрөл саарах, даатгуулагчийг санхүүгийн эрсдэлээс хамгаалах, эмнэлгүүдийн хооронд шударга өрсөлдөөнийг бий болгож, эмнэлгийн гүйцэтгэлийг сайжруулах сайн талууд бий болж байгаа хэдий ч нөгөө талдаа хэт гүйцэтгэлийн тоонд анхаарснаар тусламж үйлчилгээний **чанарт** сөргөөр нөлөөлж, шаардлагагүй тусламж үйлчилгээний тоо нэмэгдэж болзошгүй байна.

2022.05.01-2022.12.31-ний хооронд эрт илрүүлэг үзлэг, оношилгоо шинжилгээнд хамрагдсан иргэдийн судалгаа:

График№2



Хамрагдалтын байдлаас харахад 18-30, 31-45, 46-60, 61-ээс насны хамрагдалт 2.0-8.4 хувьтай буюу хангалтгүй харагдаж байна. Энэ нь малчин,


ажилгүй иргэд эрүүл мэндийн даатгалаа бүрэн төлөөгүй, насанд хүрэгчдийн эрт илрүүлэг үзлэгийг зөвхөн аймгийн Нэгдсэн эмнэлэгт хийж байгаа бөгөөд тоног төхөөрөмж, боловсон хүчний хувьд дутмаг, эрт илрүүлэг үзлэгийн ач холбогдлын талаарх иргэдийн мэдлэг мэдээлэл төдийлөн сайн биш байгаатай холбоотой байлаа.

Эрүүл мэндийн байгууллагуудад ашиглагдаж байгаа цахим систем хоорондоо уялдаа холбоо муутай, хөгжүүлэлт учир дутагдалтай байна.

- ✓ Аймгийн Эрүүл мэндийн даатгалын хэлтэс health.gov.mn
- ✓ Нэгдсэн эмнэлэг [e-health](#),
- ✓ Сум өрхийн эрүүл мэндийн төвүүд health.gov.mn
- ✓ Эмийн сангууд [orion pharm](#), [erp](#)


Эрүүл мэндийн даатгалын талаар иргэдээс авсан санал асуулгын дүнгээс дурдвал:

Эрүүл мэндийн даатгалаар ямар, ямар үйлчилгээг хөнгөлөлттэй үнээр авах талаар мэддэг үү?
129 responses



1. Эрүүл мэндийн даатгалаас хөнгөлөлттэй үнээр авдаг үйлчилгээний талаар мэдэх эсэхэд санал авахад оролцсон нийт иргэдийн 49.6 хувь нь “мэдэхгүй” гэж хариулсан байна.

Эрүүл мэндийн даатгалын байгууллагын үйл ажиллагааны ил тод байдлыг хэрхэн үнэлэх вэ?
129 responses



2. Эрүүл мэндийн даатгалын байгууллагын үйл ажиллагааны ил тод байдлыг хэрхэн үнэлэх вэ? Гэсэн санал асуулгад оролцсон нийт иргэдийн 51.9 хувь нь “дунд” 20.2 хувь нь “муу” гэж хариулсан байна.

Иргэд олон нийтийн дунд Эрүүл мэндийн даатгалын тухай хууль, холбогдох эрх зүйн актын талаар ойлголт, мэдлэг мэдээлэл дутмаг байгаа нь иргэдээс авсан санал асуулгаас харагдаж байгаа тул энэ чиглэлийн мэдээллийн хүртээмжийг сайжруулахад үр дүнтэй арга хэмжээ авч ажиллах зөвлөмжийг аймгийн Эрүүл мэндийн даатгалын хэлтэст хүргүүлээ.

Аймгийн Эрүүл мэндийн даатгалын хэлтэст 2021 онд ковид-19-ын тусламж үйлчилгээтэй холбоотой 1, 2022 онд эмийн үнийн хөнгөлөлттэй холбоотой 1, эмийн сангийн үйлчилгээтэй холбоотой 1 нийт 3 өргөдөл гомдол ирснийг хянаж шийдвэрлэсэн байна.

Аймгийн Эрүүл мэндийн даатгалын хэлтэс нь гэрээт эрүүл мэндийн байгууллагуудаас ирүүлсэн бүх нэхэмжлэлд цахим болон эмч байцаагчийн хяналтыг хийж байна. 2021-2022 онд нийт 10906 хүний 4,842.6 сая төгрөгийн хасалт хийгдсэний 24.6 хувь буюу 1,193,2 сая төгрөг нь системийн, 75.4 хувь буюу 3,649.4

сая төгрөг нь эмч байцаагчийн хасалт хийж 44 зөвлөмж, 36.6 сая төгрөгийн 12 төлбөрийн акт тогтоож барагдуулсан байна.

2021 онд 7, 2022 онд 25 нийт 32 эрүүл мэндийн байгууллагад газар дээрх хяналтыг шалгалтыг хийж 4 зөвлөмж, зөрчил арилгуулах 5 албан шаардлага, 1.2 сая төгрөгийн 1 төлбөрийн акт тогтоож хэрэгжилтийг хангуулсан байна.

Гэрээний гүйцэтгэлийг шалгуур үзүүлэлтээр үнэлэх хяналтаар 2021 онд 65, 2022 онд 38 эрүүл мэндийн байгууллагыг хамруулж 4 байгууллагад зөрчил арилгуулах 4 албан шаардлага хүргүүлж хэрэгжилтийг хангуулж ажилласан байна.

АУДИТЫН ДҮН, ДҮГНЭЛТ:

Аудитын явцад цуглуулсан нотлох баримт дүн дүгнэлтэд үндэслэн дараах дүгнэлтийг хийлээ.

- ✓ Хөгжлийн бодлогын урт болон дунд хугацааны бодлогын баримт бичгийн хүрээнд орон нутгийн эрүүл мэндийн чиглэлээр тусгасан арга хэмжээ 75.5% ийн хэрэгжилттэй байна.
- ✓ Эрүүл мэндийн даатгалын сангийн санхүүжилтийг бодит гүйцэтгэлд үндэслэн олгож байгаа боловч орлогыг бүрэн төвлөрүүлэхгүй байна.
- ✓ Эрүүл мэндийн даатгалын үр дүнд суурилсан тогтолцоонд шилжсэнээр эрүүл мэндийн салбарт тодорхой ахиц дэвшил гарах нөхцөл бүрдсэн байна.
- ✓ Орон нутгийн эрүүл мэндийн даатгалын хэлтэс нь холбогдох хяналтыг журмын дагуу хэрэгжүүлэн ажиллаж байна.

АУДИТААС ӨГСӨН ЗӨВЛӨМЖ:

Аудитын явцад цуглуулсан нотлох зүйлс, аудитын дүн, тайланд үндэслэн дараах зөвлөмжийг хүргүүлсэн.

Аймгийн Эрүүл мэндийн даатгалын хэлтсийн даргад:

- ✓ "Бүртгэл тайлангийн маягтыг шинэчлэн батлах тухай" Эрүүл мэндийн сайдын 2022 оны А/355 дугаар тушаалын хавсралт маягтаар гаргаж байгаа бүртгэл, тайлан мэдээг алдаагүй үнэн зөв тайлагнаж ажиллах.
- ✓ Иргэд олон нийтийн дунд Эрүүл мэндийн даатгалын тухай хууль, холбогдох эрх зүйн актын талаарх ойлголт, мэдлэг, мэдээллийн хүртээмжийг сайжруулахад үр дүнтэй арга хэмжээ авч ажиллах
- ✓ Эрүүл мэндийн байгууллагуудад хяналт, шалгалт, чанарын үнэлгээнд хамрагдах эрүүл мэндийн байгууллагын тоог нэмэгдүүлэх, чанар, төлбөрийн хяналтад дүн шинжилгээ хийж тайлагнах чиг үүргийн хэрэгжилтийг бүрэн ханган ажиллах.